

曲

律

曲律卷第三

會稽方諸生王驥德伯良撰

柳城翁孫如法世行訂

勾餘

鬱藍生呂天成勤之校

論用事第二十一

曲之佳處不在用事亦不在不用事好用事失之堆積無事可用失之枯寂要在多讀書多識故實引得的確用得恰好明事暗使隱事顯使務使唱去人人都曉不須解說又有一等事用在句中令人不覺如禪家所謂撮鹽水中飲水乃知鹹味方是妙手西廂

琵琶用事甚富，然無不恰好，所以動人。玉玦句句用事，如盛書櫃子，番使人厭惡，故不如拜月一味清空，自成一家之爲愈也。又用得古人成語恰好，亦是快事。然只許單用一句，要雙句，須別處另尋一句對之。如琵琶月雲高曲末二句，第一調正是西出陽關無故人，須信家貧不是貧，第二調他須記一夜夫妻百夜恩，怎做得區區陌路人，第三調他不到得非親，却是親，我自須防人不仁，如此方不堆積，方不蹈襲，故知此老胸中別具一副爐錘也。

論過搭第二十二

過搭之法、雜見古人詞曲中、須各宮各調、自相爲次、
又須看其腔之粗細、板之緊慢、前調尾與後調首、要
相配、叶前調板與後調板、要相連屬、古每宮調皆有
賺、取作過度而用、緣慢詞卽引止着底板、驟接過曲、
血脉不貫、故賺曲前段皆是底板、至末二句始下實
板、戲曲中已間賓白、故多不用、諸宮調惟仙呂許與
雙調相出入、其餘界限甚嚴、不得陵犯、惟十三調譜
類多出入、中商黃調以商調黃鍾二調合成、高平調
與諸調皆可出入、其餘各調出入、詳見十三調譜中、
或謂南曲原不配絃索、不必拘拘宮調、不知南人第

取按板然未嘗不可取配絃索又譬置目眉上置鼻口下亦何妨視嗅但不成人面部位終非造化生意耳凡一調中有取各調一二句合成如六犯清音七犯瓊龍等曲雖各調自有唱法然既合爲一須唱得接貼融化令不見痕迹乃妙何元朗謂北曲大和絃是慢板花和絃是緊板如中呂快活三臨了來一句放慢來接唱朝天子皆大和又是慢板緊慢相錯何等節奏南曲如錦堂月後僥僥令念奴嬌後古輪臺梁州序後節節高一緊而不復收矣然戲曲亦有中段却放緩唱者不可一律論也

論曲禁第二十三

曲律以律曲也律則有禁具列以當約法

重韻

一字二三押長套及戲曲不拘

借韻

雜押傍韻如支思又押齊微類

犯韻

有正犯句中字不得與押韻同音如冬犯東類有傍犯句中即上去聲不得與平聲相犯

如董凍犯東類

犯聲

即非韻脚凡句中字同聲俱不得犯如上例

平頭

第二句第一字不得與第一句第一字同音

合脚

第二句末一字不得與第一句末一字同音

上去疊用

上去字須間用不得用兩上兩去

上去去上倒用

宜上去，不得用去上，宜去上，不得用上，去活法，見前論平仄條中。

入聲三用

疊用三入聲

一聲四用

不論平上去入，不得疊用四字。

陰陽錯用

宜陰用陽字，宜陽用陰字。

閉口疊用

凡閉口字，只許單用，如用侵，不得又用尋，或又用監，咸廉纖等字，雙字如深深

穆穆懶懶類，不禁。

韻脚多以入代平

此類不免，但不許多用，如純用入聲韻，及用在句中者，俱不禁。

疊用雙聲

字母相同，如瓊瓏皎潔類，止許用二字，不許連用至四字。

疊用疊韻

二字同韻，如逍遙燦爛類，亦止許用二字，不許連用至四字。

開閉口韻同押

凡閉口，如侵尋等韻，不許與開口韻同押。

陳腐

不新采

生造

不現成

俚俗

不文雅

蹇澀

不順溜

粗鄙

不細膩

錯亂

無次序

蹈襲

忌用舊曲語意若成語不妨

沾唇

不脫口

拘噪

平仄不順

方言

他方人不曉

語病

聲不雅如中原音韻所謂達不着主母機或曰燒公鴨亦可類

請客

如咏春而及夏題柳而及花類

太文語

不當行

太晦語

費解說

經史語

如西廂靡不有初鮮克有終類

學究語

頭巾氣

書生語

時文氣

重字多

不論全套單隻凡重字俱用檢去

襯字多

襯至五六字

堆積學問

錯用故事

宮調亂用

緊慢失次

對偶不整

右諸禁凡四十條、在知音高手、自然不犯、如不能盡免、須檢點去其甚者、令不礙眼、不爾、終難爲識者、非法家曲也、

論套數第二十四

套數之曲、元人謂之樂府、與古之辭賦、今之時義、同一機軸、有起有止、有開有闔、須先定下間架、立下主

意排下曲調，然後遣句，然後成章，切忌湊插，切忌將就，務如常山之蛇，首尾相應。又如鮫人之錦，不着一絲紕繆，意新語俊，字響調圓，增減一調，不得顛倒，一調不得有規有矩，有色有聲，衆美具矣。而其妙處，政不在聲調之中，而在句字之外。又須煙波渺漫，姿態橫逸，攬之不得，挹之不盡。摹歡則令人神蕩，寫怨則令人斷腸，不在快人而在動人。此所謂風神，所謂標韻，所謂動吾天機，不知所以然，而然方是神品，方是絕技。卽求之古人，亦不易得。金在衡，謂古散套無佳者，僅北調萬種閒愁一曲，何元朗以爲祇得馬上抱。

雞三市鬪袖中携劔五陵遊二句差勝乃用晚唐羅
隱詩其餘蕪淺殊不足觀余謂北曲尚有佳者惟南
曲最不易得弇州謂暗想當年羅帕上把新詩寫是
元人作學問才情足冠諸本是大不然此曲首調第
一七字句便下五襯字旣已非法第三句多了一字
語亦無謂第四五句軟玉溫香嫩枝柔葉空無着落
末二句琴瑟正和協不覺花影轉過梧桐月意復不
接第二調沉醉東風又起一頭特此後語意頗佳至
末段詞亦爛熳奔湧然只是一意敷衍又不當與前
忒忒令燕山絕湘江竭斷魚封雁帖三語相妨無足

取也無已。則陳大聲因他消瘦一曲，又首調羞問花時，還問柳數語，祇是請客。次調懶畫眉，繡戶輕寒透，十二珠簾不上鉤，二句奏插第三調金索掛梧桐，黃鶯似喚儔四句，又是請客。只浣溪沙以下數調，語意流麗，頗自可人。前段終非完璧，才難之歎，於斯益信。大畧作長套曲，只是打成一片，將各調臚列待他來，湊我機軸，不可做了一調，又尋一調意思。西廂記每套只是一箇頭腦，有前調末句，牽搭後調，做者有後調首句，補足前調，做者單鎗匹馬，橫衝直撞，無不可人。他曲殊未能知此窠竅也。

論小令第二十五

作小令與五七言絕句同法要醞藉要無襯字要言簡而趣味無窮昔人謂五言律詩如四十箇賢人着一箇屠沽不得小令亦須字字看得精細着一戾句不得着一草率字不得弇州論詞所謂宛轉綿麗淺至儂俏正作小令至語周氏謂樂府小令兩途樂府語可入小令小令語不可入樂府未必其然渠所謂小令蓋市井所唱小曲也

論咏物第二十六

咏物毋得罵題却要開口便見是何物不貴說體只

貴說用佛家所謂不卽不離是相非相只於牝牡驪黃之外約畧寫其風韻令人髣髴中如燈鏡傳影了然目中去摸捉不得方是妙手元人王和卿咏大蝴蝶掙破莊周夢兩翅駕東風三百座名園一採一箇空誰道風流種說殺尋芳的蜜蜂輕輕飛動把賣花人搨過橋東只起一句便知是大蝴蝶下文勢如破竹却無一句不是俊語古詞咏柳窺青眼開口便知是柳下偏宜向朱門羽戟畫橋遊舫又倚闌凝望消得幾番暮雨斜陽等皆從柳外做去所以渺茫多趣他如祝京兆咏月陶陶區區咏雁梁伯龍咏蛺蝶等非

無一二佳語、只夾雜凡俗、便是不成片段、小令北調、
王西樓最佳、如咏浴裙、睡鞋等曲、首首尖新、王漢陂、
馮海浮、咏鞋杯諸曲、亦多巧句、海浮月兒芽、彎環在
腮上、筍兒尖穿破了鼻梁、及環兒腳一彎、花兒瓣兩
邊、又心坎兒裏踢蹬、肚囊兒裏款行、腸積兒裏穿芳
徑等、尤稱妙絕、亦未免間以粗豪語、不無遺恨耳、問
如何是說體、如昔人咏柳絮、一似半天飄粉、遶樹凝
酥、平地飛瓊、堵是也、如何是說用、如咏草、斜陽外幾
家斷橋村塢、又池塘雨歇、夢回南浦、又王孫何事在
長途、好歸去、又驚春暮是也、

論俳諧第二十七

俳諧之曲、東方滑稽之流也、非絕類之資、絕俊之筆、又運以絕圓之機、不得易作、着不得一箇太文字、又着不得一句張打油語、須以俗爲雅、而一語之出、輒令人絕倒、乃妙、元人嘲秃指甲詞、十指如枯筍、和袖捧金尊、搗殺銀筆字、不真、揉癢天生鈍、縱有相思淚痕、索把拳頭搵、中原音韻、及弇州、皆極賞之、然首語及揉癢天生鈍句、尚覺着相、此體亦是西樓最佳、如失雞轉五方等曲、皆極當行、吾鄉徐天池先生、生平諧謔小令極多、如嘲少髮大脚妓、黃鶯兒中二句、粧

臺上省油、厮打處省揪末、下粧樓、金蓮一步占着兩塊大磚頭、嘲瘦妓、四兩麪條搓抹胸膛、三寸羅俏郎君一手橋平聲三箇嘲歪嘴妓、一箇海螺兒在腮邊不住吹、面前說話倒與傍人對末、抹胭脂、櫻桃一點、搓去聲過鼻梁、西等曲大爲士林傳誦、今未見其人也。

論險韻第二十八

作曲好用險韻、亦是一僻、須韻險而語則極俊、又極穩妥、方妙。西廂之不念法華經、不禮梁王懺、及彩筆題詩、迴文織錦、何語不俊、何韻不妥、又國初人蕭淑蘭劇、全押廉纖監咸侵尋桓歡四韻、亦字字穩俏、近

見押此等韻者全無奇怪峭絕處只是湊得韻來便以爲難事夫欲借險韻以見難而止是平通趁韻無以異於人也亦何取此等韻爲耶故知百尺竿頭逞技非古所謂肉飛仙手段不可庸衆人故當以此爲戒

論巧體第二十九

古詩有離合建除人名藥名州名數目集句等體元人以數目入曲作者甚多句首自一至十有順去逆回者輟耕錄載折桂令起句博山銅細裊香風一句兩韻名曰短柱爲極難作虞邵菴作鑾輿三顧茅廬

一曲擬之則二字一韻蓋尤難矣喬夢符有當時處士山祠一曲亦用此體嘉靖間北都有劉憲副效祖者用此體凡平聲每韻各賦一首可稱一癖詞林摘艷有粉蝶兒從東隴風動松呼長套句句兩字一韻然不見佳藥名詩須字則正用意却假借讀去不覺詳看始見方得作法如所謂四海無遠志一溪甘遂心是也陳大聲有藥名散套首句今年牡丹開較遲便是直用其名更無別意又後多借同音字爲用如借霜梅爲雙眉茴香爲回鄉其語猶俏至借白芨爲北極滑石爲化石政可發一胡盧矣今紅蕖用藥名

牌名五色五聲八音及瀟湘八景離合集句等體種種皆備然不甚合作倘不能窮極妙境不如毋添蛇足之爲愈也

論劇戲第三十

劇之與戲南北故自異體北劇僅一人唱南戲則各唱一人唱則意可舒展而有才者得盡其春容之致各人唱則格有所拘律有所限卽有才者不能恣肆於三尺之外也於是貴剪裁貴鍛鍊以全帙爲大間架以每折爲折落以曲白爲粉堊爲丹腹勿落套勿不經勿太蔓蔓則局懈而優人多刪削勿太促促則

氣迫而節奏不暢達，毋令一人無着落，毋令一折不
照應，傳中緊要處，須重着精神，極力發揮使透，如浣
紗遺了，越王嘗膽，及夫人採葛事，紅拂私奔，如姬竊
符，皆本傳大頭腦，如何草草放過，若無緊要處，只管
敷衍，又多惹人厭憎，皆不審輕重之故也。又用宮調，
須稱事之悲歡苦樂，如遊賞則用仙呂雙調等類，哀
怨則用商調越調等類，以調合情，容易感動得人，其
詞格俱妙，大雅與當行叅間，可演可傳，上之上也。詞
藻工，句意妙，而不諧里耳，爲案頭之書，已落第二義。
旣非雅調，又非本色，掇拾陳言，湊插俚語，爲學究，爲

張打油勿作可也

論引子第三十一

引子須以自已之腎腸代他人之口吻蓋一人登場必有幾句緊要說話我設以身處其地模寫其似却調停句法點檢字面使一折之事頭先以數語該括盡之勿晦勿泛此是上諦琵琶引子首首皆佳所謂開門見山手段浣紗如范蠡而曰尊王定霸不在桓文下施之越王則可越夫人而曰金井轆轤鳴上苑笙歌度簾外忽聞宣召聲忙感金蓮步是一宮人語耳只苧羅山下一引頗佳中春風無那却不可解餘

俱非腐則漫、玉玦諸引、雖傷過文、然語俊調雅、不失爲才士之作、近惟還魂二夢之引、時有最俏而最當行者、以從元人劇中打勘出來故也、明珠引子、時用詩餘、寶劍引子、多出已創、皆不足爲法、自來唱引子、皆於句盡處用一底板、詞隱於用韻句下板、其不韻句、止以鼓點之、譜中只加小圈讀斷、此是定論、

論過曲第三十二

過曲體有兩途、大曲宜施文藻、然忌太深、小曲宜用本色、然忌太俚、須奏之場上、不論士人閨婦、以及村童野老、無不通曉、始稱通方、最要落韻穩當、如琵琶

手指上血痕尚在衣麻、衣麻是何話說、紅拂髻雲撩、
下無亂字是歇後語矣、皆謂趁韻、又不可令有敗筆
語、琵琶僥僥令、旣云但願歲歲年年入長在、父母共
夫妻相勸酬、下却又云夫妻長厮守、父母願長久、說
過又說、至兩山排闥二句、與上何干、大是請客、尾聲
惟有快活是良謀、直張打油語矣、用韻須是一韻到
底方妙、屢屢換韻、畢竟才短之故、不得以琵琶拜月
藉口、若重韻則正不必拘、古劇皆然、避而牽強、不若
重而穩俏之爲愈也、

論尾聲第三十三

皆優人穿插傳授爲之、本子上無甚佳者、惟近顧學憲青衫記有一二語咄咄動人、以出之輕俏、不費一毫做造力耳、黃山谷謂作詩似作雜劇、臨了須打諢方是出場、蓋在宋時已然矣、

論落詩第三十六

落詩亦惟琵琶得體、每折先定下古語二句、却湊二語其前、不惟場下人易曉、亦令優人易記、自玉玦易詩語爲之、於是爭趨於文、邇有集唐句以逞新奇者、不知喃喃作何語矣、用得親切較可、如浣紗范蠡遇西施折、用芙蓉脂肉綠雲鬟二詩、所謂風乍起、吹皺

一池春水、干卿何事、

論部色第三十七

夢遊錄云、今教坊開場、先引一段尋常事、名曰艷段、次正雜劇爲兩段、末泥色主張、引戲色分付、副淨色發喬、副末色打諢、又或添一人裝孤、其次曲破、斷送者謂之把香、輟耕錄云、傳奇出於唐宋、宋有戲曲、金有院本、雜劇、院本一人曰副淨、爲叅軍、一曰副末、謂之蒼鶻、鶻能擊衆鳥、末可打副淨、故云、一曰引戲、一曰末泥、一曰裝孤、又謂之五花爨弄、今南戲、副淨同上、而末泥卽生、裝孤卽旦、引戲則末也、一說曲貴熟而

曰生、婦宜夜而曰旦、末先出而曰末、淨喧鬧而曰淨、反言之也、其貼則旦之佐、丑則淨之副、外則末之餘、明矣、按丹丘先生謂雜劇院本有正末、副末、徧、狐、靚、鵠、猱、捷、譏、引、戲、九色之名、又謂唐爲傳奇、宋爲戲文、金時院本雜劇合而爲一、元分爲二、雜劇者、雜戲也、院本者、行院之本也、又按元雜劇中名色不同、末則有正末、副末、冲末、卽副末、砌末、小末、旦則有正旦、副旦、貼旦、卽副旦、茶旦、外旦、小旦、旦兒、卽小旦、卜旦、亦曰卜兒、卽老旦、又有外、有孤、裝官者、有細酸、亦裝生者、有孛老、卽老小、厮曰徠、從人曰祗從、雜腳曰雜當、裝賊曰邦老、凡厮

役皆曰張千、有二人則曰李萬、凡婢皆曰梅香、凡酒保皆曰店小二、今之南戲則有正生、貼生、或小生、正旦、貼旦、老旦、小旦、外末、淨丑、即中淨、小丑、即小淨、共十二人或十一人、與古小異、古孤以裝官、夢遊錄所謂裝孤即旦、非也、又丹丘以狽狐鵠獠竝列、即孤當亦是狐字之誤耳、嘗見元劇本、有於卷首列所用部色名目、并署其冠服器械、曰某人冠某冠、服某衣、執某器、最諄然其所謂冠服器械名色、今皆不可復識矣

論訛字第三十八

戲曲有相傳既久、致訛字間出、或係刻本之誤、或爲

俗子所改致撰人叫屈識者貽嗤不一而足如西廂
風欠酸丁之欠俗子作奐字音至去其字之轉筆處
一人并字形亦爲改削不知字書從無此字元賈仲

名蕭淑蘭劇寄生草曲改不了

強去聲

文徹醋饑寒臉

音鐵不
作檢音

斷不了詩云子曰酸風欠離不了之乎者也

腌窮儉以欠與上之臉下之儉叶韻明白可證蓋起
於南人但知有風耍俗語不知北音遂妄倡是說不
意金在衡輩亦爲所誤筆之正訛夫使果爲風耍之
義何不逕用耍字而以欠字代之耶其在琵琶記者
尤多如請糧晉天樂原以家麻歌戈二韻通用其云

豈忍見公婆受餓、正與上弟和兄更沒一箇下直恁
摧挫相叶、却改作受餒、又有從而附和之者、以爲避
俗、夫琵琶久用本色語矣、餓字亦何俗之有、乃妄改
之、而反以不韻爲快耶、成親女冠子引、丈夫得志、佳
婿乘龍、與上下入聲簇促韻全不叶、或改作坦腹、於
韻是矣、而與後之兀的東床、難教我坦腹、又犯重複、
直是難擇、則是東嘉自誤、雙聲子娘介福、用詩經語
俗子、改作分福、以不識介字義、又與分字字形相近
之故、後復改作萬福、又万與分相近之故也、剪髮香
羅帶第三調、堪憐愚婦人、下當云、單身又貧、却易爲

竊亦誤記中每對偶甚整向謂孔雀屏開當作開屏
與下芙蓉隱褥相對近詞隱於考誤已正之矣又嘗
疑新篁池閣槐陰庭院二語槐陰與新篁不對必有
誤字新篁當以高槐爲對乃的孟郊詩高槐結浮陰
非無出也卽此曲前云深院荷香滿又只管打扇與
燒香又一架茶蘼滿院香下又云香肌無暑又一點
風來香滿又香奩日永又香消寶篆沈煙又怎遂得
黃香願又猛然心地熱透香汗又只見荷香十里又
清香瀉下瓊珠濺連用十一香字重疊之甚而香滿
香奩香消三句疊用尤爲不妥有改香奩作湘簾者

與上薔薇簾幙又重不可強爲之解本折落詩歡娛
休問夜如何此景良宵能幾何兩何字亦重下何字
蓋多字之誤耳他如明珠記二郎神換頭果然是萍
水相遭與上之間分曉下之郎年少相叶因坊本誤
刻而皆唱作相逢又紅拂記古輪臺刺船陳孺刺字
或作次音或作辣音皆非當音作戚陳孺謂陳平也
刺船事見史記却無正音莊子漁父篇註音戚此可
爲證懶畫眉只得顛倒衣裳試觀渠倒字皆唱作上
聲夫去聲則顛倒之義也上聲則傾側之倒於義不
協矣此則起於朱子註詩此老執拘甚不可解詩言

東方未明顛倒衣裳顛之倒之自公召之下顛之倒之卽覆說上文顛倒二字之辭其實一也却於上倒字音作上聲而下倒字音作去聲此何說也又撇道非人調侃說脚也湯海若還魂記末折把那撇道兒搭長舌揷是以撇道認作顛子也誤甚又散套梅家庄水罐湯餅打爲磁屑當作謝家庄正崔護乞漿處也又窺青眼曲白練序換頭蕭郎信渺茫下舊譜原作還追想當年處士庄詞選作漫留下當年繫馬椿俚甚非白語眼望旌節旗耳聽好消息出元人雜劇今皆訛作旌捷旗然似不如捷旌旗與下好消息對

爲的、憑君走到夜摩天、夜摩天、語出藏經、今皆訛作
焰摩天、不如意事常八九、可與言人無二三、謂可與
語言之人難得也、今訛作可與人言、兩葉浮萍歸大
海、蓋本白樂天與君何處重相遇、兩葉浮萍大海中
詩語詞隱、唱曲當知以爲非是、或偶未見此詩耳、大
抵刻本中誤處、須以意理會、不可便仍其誤、彼優人
俗子、旣不能曉、吾輩又不爲是正、幾何不令千古之
贗贗耶

雜論第三十九上

係縱筆漫書
初無倫次

詞曲小道、過雲落塵、遠不暇論、明皇製春光好曲而

桃杏皆開、世歌虞美人曲、而草能按節以舞、聲之所感、豈其微哉、

南北二調、天若限之、北之沈雄、南之柔婉、可畫地而知也、

北人工篇章、南人工句字、工篇章、故以氣骨勝、工句字、故以色澤勝、

勝國諸賢、蓋氣數一時之盛、王關馬白、皆太都人也、

今求其鄉、不能措一語矣、

大都卽今北京

正音譜中所列元人、各有品目、然不足憑、涵虛子於文理原不甚通、其評語多足付笑、又前八十二人有

評後一百五人漫無可否筆力竭耳非真有所甄別其間也

胡鴻臚言元時臺省元臣郡邑正官皆其國人爲之中州人每沈抑下僚志不獲展如關漢卿乃太醫院尹馬致遠江浙行省務官宮大用釣臺山長鄭德輝杭州路吏張小山首領官於是多以有用之才寓於聲歌以紓其拂鬱感慨之懷所謂不得其平而鳴也然其時如貫酸齋白無咎楊西菴胡紫山盧疎齋趙松雪虞邵菴輩皆昔之宰執貴人也而未嘗不工於詞以今之宰執貴人與酸齋諸公角而不勝以今之

文人墨士與漢卿諸君角而又不勝也。蓋勝國時上
下成風皆以詞爲尚。於是業有專門。今吾輩操管爲
時文。旣無暇染指。迨起家爲大官。則不勝功名之念。
致仕居鄉。又不勝田宅子孫之念。何怪其不能角而
勝之也。

人之賦才各有所近。馬東籬王實甫皆勝國名手。馬
於黃梁夢岳陽樓諸劇種種妙絕。而一遇麗情便傷
雄勁。王於西廂絲竹芙蓉亭之外作他劇多草草不
稱。尺有所短信然。

古戲不論事實亦不論理之有無可否於古人事多

損益緣飾爲之。然尚存梗槩。後稍就實。多本古史傳。雜說畧施丹堊。不欲脫空杜撰。邇始有捏造無影響之事。以欺婦人小兒者。然類皆優人及里巷小人所爲。大雅之士亦不屑也。

元人作劇。曲中用事。每不拘時代先後。馬東籬三醉岳陽樓。賦呂純陽事也。寄生草曲。這的是燒豬佛印待東坡。抵多少騎驢魏野逢潘閬。俗子見之。有不訾以爲傳。唐人用宋事耶。畫家謂王摩詰以牡丹芙蓉蓮花同畫一景。畫袁安高臥圖。有雪裏芭蕉。此不可易與人道也。

詞曲本文人能事亦有不盡然者周德清撰中原音韻下筆便如葛藤所作宰金頭黑脚天鷲折桂令燕子來海棠開寨兒令臉霞鬢鴉朝天子等曲又特警策可喜卽文人無以勝之是殊不可曉也

南北二曲用字不得相混今南曲中有用者字兀字您字喲字及南曲而用北韻以白爲排以壑爲好之類皆大非體也

元人諸劇爲曲皆佳而白則猥鄙俚褻不似文人口吻蓋由當時皆教坊樂工先撰成間架說白却命供奉詞臣作曲謂之填詞凡樂工所撰士流恥爲更改

故事款多悖理、辭句多不通、不似今作南戲者盡出
一手、要不得爲諸君子疵也、

北曲方言時用、而南曲不得用者、以北語所被者廣、
大畧相通、而南則土音各省郡不同、入曲則不能通
曉故也、

元人雜劇、其體變幻者固多、一涉麗情、便關節大畧
相同、亦是一短、又古新奇事迹、皆爲人做過、今日欲
作一傳奇、毋論好手難遇、卽求一典故新采可動人
者、正亦不易得耳、

元詞選者甚多、然皆後人施手、醇疵不免、惟太平樂

府係楊澹齋所選首首皆佳蓋以元人選元詞猶唐人之選中興間氣河洛英靈二集具眼故在也

北人尚餘天巧今所流傳打棗竿諸小曲有妙入神品者南人苦學之決不能入蓋北之打棗竿與吳人之山歌不必文士皆北里之俠或閨閫之秀以無意得之猶詩鄭衛諸風脩大雅者反不能作也

世稱曲手必曰關鄭白馬顧不及王要非定論稱戲曲曰荆劉拜殺益不可曉殆優人戲單語耳

唐三百年詩人如林元八十年北詞名家亦不下二百人明興二百四十年作南曲錚錚者指不易多屈

何哉

古戲必以西廂琵琶稱首、遞爲桓文、然琵琶終以法讓西廂、故當離爲雙美、不得合爲聯璧、

琵琶遣意嘔心、造語刺骨、似非以漫得之者、顧多蕪語累字、何耶、

西廂組艷、琵琶脩質、其體故然、何元朗竝訾之、以爲西廂全帶脂粉、琵琶專弄學問、殊寡本色、夫本色尚有勝二氏者哉、過矣、

拜月語似草草、然時露機趣、以望琵琶、尚隔兩塵、元朗以爲勝之、亦非公論、

世傳拜月爲施君美作然錄鬼簿及太和正音譜皆載在漢卿所編八十一本中不曰君美君美名惠杭州人吳山前坐賈也南戲自來無三字作目者蓋漢卿所謂拜月亭係是北劇或君美演作南戲遂仍其名不更易耳

古之優人第以諧謔滑稽供人主喜笑未有并曲與白而歌舞登場如今之戲子者又皆優人自造科套非如今日習現成本子俟主人揀擇而日日此伎倆也如優孟優旃後唐莊宗以迨宋之靖康紹興史籍所記不過葬馬漆城李天下公冶長二聖環等諧語

而已。卽金章宗時董解元所爲西廂記亦第是一人倚絃索以唱而間以說白。至元而始有劇戲。如今之所搬演者是此竅由天地開闢以來不知越幾百千萬年。俟夷狄主中華而於是諸詞人一時林立始稱作者之聖。嗚呼異哉。

南戲曲從來每人各唱一隻。自拜月以兩三人合唱而詞隱諸戲遂多用此格。畢竟是變體。偶一爲之可耳。

琵琶工處甚多。然時有語病。如第二折引風雲太平日。第三折引春事已無有三十一折引也只爲我門

楫皆不成語、又蔡別後、趙氏寂寥可想矣、而曰翠減
祥鸞羅幌、香消寶鴨、金爐楚館、雲閒秦樓、月冷後、又
曰寶瑟塵埋、錦被羞鋪、寂寞瓊牕、蕭條朱戶等語、皆
過富貴、非趙所宜、二十六折、駐馬聽、書寄鄉關二曲、
皆本色語、中着啼痕、緘處、翠綃斑二語、及銀鈎飛動、
綵雲牋二語、皆不搭色、不得爲之護短、至後八折、真
儻父語、或以爲朱教諭所續、頭巾之筆、當不誣也、
弇州謂琵琶長空萬里、完麗而多蹈襲、似誠有之、元
朗謂其無蒜酪氣、如王公大人之席、馳峰熊掌、肥膾
盈前、而無蔬笋蜺蛤、遂欠風味、余謂使盡廢馳峰熊

掌抑可以羞王公大人耶此亦一偏之說也

古曲自琵琶香囊連環而外如荆釵白兔破窑金印
躍鯉牧羊殺狗勸夫等記其鄙俚淺近若出一手豈
其時兵革孔棘人士流離皆村儒野老塗歌巷詠之
作耶殺狗頃吾友鬱藍生爲釐韻以飭而整然就理
也蓋一幸矣

元初諸賢作北劇佳手疊見獨其時未有爲今之南
戲者遂不及見其風槩此吾生平一恨

作北曲者如王馬關鄭輩創法甚嚴終元之世沿守
惟謹無敢踰越而作南曲者如高如施平仄聲韻往

往離錯作法於涼、馴至今日、蕩然無復底止、則兩君
不得辭作俑之罪、真有幸不幸也、

元朗謂呂蒙正內紅粧艷質、喜得功名遂、王祥內夏
日炎炎、今箇最關情處、路遠迢迢、殺狗內千紅百翠、
江流內崎嶇去路賒、南西廂內團團皎皎、已到西廂、
翫江樓內花底黃鸝、子母冤家內東野翠煙消、詐妮
子內春來麗日長、皆上絃索、正以其辭之工也、亦未
必然、此數曲、昔人偶打入絃索、非字字合律也、又謂
寧聲叶而辭不工、無寧辭工而聲不叶、此有激之言、
夫不工奚以辭爲也、

明珠記本唐人小說事極典麗第曲白類多蕪蔓僅良宵香一套不特詞句婉俏而轉折亦委曲可念弇州所謂其兄浚明給事助之者耶然引曲用調名殊不佳尾聲及後黃鶯兒二曲俱俚率不稱若出兩手何耶

中原音韻十七宮調所謂仙呂宮清新綿邈等類蓋謂仙呂宮之調其聲大都清新綿邈云爾其云十七宮調各應於律呂於字以不閑文理之故太和正音譜於仙呂等各宮調字下加一唱字係是贅字然猶可以唱代曲字謂某宮之曲其聲云云也至弇州加

一宜字則大拂理矣。豈作仙呂宮曲與唱仙呂宮曲者獨宜清新綿邈而他宮調不必然以是知蛇足之多爲本文累也。

論曲當看其全體力量如何不得以一二語偶合而曰某人某劇某戲某句某句似元人遂執以槩其高下寸瑜自不掩尺瑕也。

曲之尚法固矣若僅如下算子畫格眼垛死屍則趙括之讀父書故不如飛將軍之橫行匈奴也。

當行本色之說非始於元亦非始於曲蓋本宋嚴滄浪之說詩滄浪以禪喻詩其言禪道在妙悟詩道亦

然惟悟乃爲當行、乃爲本色、有透徹之悟、有一知半解之悟、又云、行有未至、可加工力、路頭一差、愈驚愈遠、又云、須以大乘法眼爲宗、不可令墮入聲聞辟支之果、知此說者、可與語詞道矣、

作詞守成法、尺寸寸、句數字、研俾無累功、令易耳、然其至爾力、其中非爾力、故入曲三昧、在巧之字、

唱曲欲其無字、卽作曲者用綺麗字面、亦須下得恰好、全不見痕迹、礙眼、方爲合作、若讀去而煙雲花鳥、金碧丹翠、橫垛直堆、如攤賣古董、鋪綴百家衣、使人種種可厭、此小家生活、大雅之士所深鄙也、

上去去上之間用有其字必不可易而強爲避忌如
易地爲土、改字作厦、致與上下文生拘不協、甚至文
理不通、不若順其自然之爲貴耳、

南曲之有陰陽也、其竅今日始闢、然此義微之又微、
所不易辨、不能字字研其至當、當亦如前取務頭法、
將舊曲子令優人唱過、但有其字是而唱來却非其
字本音者、卽是宜陰用陽、宜陽用陰之故、較可尋繹
而得之也、

揭調之說、不特今曲爲然、楊用脩詩話云、樂府家謂
揭調者、高調也、高駢詩、公子邀歡月滿樓、佳人揭調

唱伊州、便從席上西風起、直到蕭關水盡頭、則唐時之歌曲、可想見矣、

凡曲之調、聲各不同、已備載前十七宮調下、至各韻爲聲、亦各不同、如東鍾之洪、江陽皆來、蕭豪之響、歌戈家麻之和、韻之最美、聽者寒山桓歡、先天之雅、庚青之清、尤侯之幽、次之、齊微之弱、魚模之混、真文之緩、車遮之用、雜入聲、又次之、支思之萎、而不振、聽之令人不爽、至侵尋、監咸、廉纖、開之、則非其字、閉之、則不宜口、胸、勿多用可也、

作散套、較傳奇更難、傳奇各有本等事頭、鋪襯、散套

鑿空爲之、散套中登臨遊賞之詞、較易、閨情尤難、蓋
閨情古之作者甚多、好意好語、皆爲前人所道、不易
脫此窠臼故也、

白樂天作詩、必令老嫗聽之、問曰解否、曰解、則錄之、
不解、則易作、劇戲亦須令老嫗解得、方入衆耳、此卽
本色之說也、

劇戲之道、出之貴實、而用之貴虛、明珠浣紗紅拂、玉
合、以實而用實者也、還魂、二夢、以虛而用實者也、以
實而用實也、易、以虛而用實也、難、

劇戲之行與不行、良有其故、庸下優人、遇文人之作、

不惟不曉亦不易入口村俗戲本正與其見識不相
上下又鄙猥之曲可令不識字人口授而得故爭相
演習以適從其便以是知過施文采以供案頭之積
亦非計也

世多可歌之曲而難可讀之曲歌則易以聲掩詞而
讀則不能掩也

世有不可解之詩而不可令有不可解之曲曲之不
可解非入方言則用僻事之故也胡廝啞兩喬木此
方言也韓景陽大來頭此僻事也作南戲而兩語皆
南人所不識皆曲之病也

古戲如荆劉拜殺等傳之幾二三百年、至今不廢、以其時作者少、又優人戲單無此等名目、便以爲缺典、故幸而久傳、若今新戲日出、人情復厭常喜新、故不過數年、卽棄閣不行、此世數之變也、

作曲如生人耳、目、口、鼻、非不犁然各具、然西施嫫母、妍醜殊觀、王公廝養、貴賤異等、墮地以來、根器區別、欲勉強一分幾而及之、必不可得也、

唐之絕句、唐之曲也、而其法宋人不傳、宋之詞、宋之曲也、而其法元人不傳、以至金元人之北詞也、而其法今復不能悉傳、是何以故哉、國家經一番變遷、則

兵燹流離性命之不保、遑習此太平娛樂事哉、今日
之南曲、他日其法之傳否、又不知作何底止也、爲嘸
且懼

曲律卷第四

會稽方諸生王驥德伯良撰

勾餘

柳城翁孫如法世行訂

鬱藍生呂天成勤之校

雜論第三十九下

李中麓序刻元喬夢符張小山二家小令以方唐之
李杜夫李則實甫杜則東籬始當喬張蓋長吉義山
之流然喬多凡語似又不如小山更勝也

關雎鹿鳴今歌法尚存大都以兩字抑揚成聲不易
入里耳漢之朱鷺石流讀尚聲牙聲定椎樸晉之子

夜莫愁六朝之玉樹金釵唐之霓裳水調卽日趨冶
艷然祇是五七詩句必不能縱橫如意宋詞句有長
短聲有次第矣亦尚限邊幅未暢人情至金元之南
北曲而極之長套歛之小令能令聽者色飛觸者腸
靡洋洋纚纚聲蔑以加矣此豈人事抑天運之使然
哉

予在都門日一友人攜文淵閣所藏刻本樂府大全
又名樂府渾成一本見示蓋宋元時詞譜

卽宋詞
非曲譜

止

林鍾商一調中所載詞至二百餘闕皆生平所未見
以樂律推之其書尚多當得數十本所列凡目亦世

所不傳所畫譜絕與今樂家不同有卜算子浪淘沙
鵲橋仙摸魚兒西江月等皆長調又與詩餘不同有
嬌木笳則元人曲所謂喬木查蓋沿其名而誤其字
者也中佳句有酒入愁腸誰信道都做淚珠兒滴又
怎知道恁地憶再相逢瘦了纔信得皆前人所未道
以是知詞曲之書原自浩瀚卽今曲當亦有詳備之
譜一經散逸遂并其法不傳殊爲可惜今列其目并
譜於後以存典刑一斑

林鍾商目 隋呼歇指調

娟聲

品有大品
小品

歌曲子

唱歌

中腔

踏歌

引

三臺

傾盃樂

慢曲子

促拍

令

序

破子

急曲子

木笪

丁聲長行

大曲

曲破

娟聲譜

一レ予シク

小品譜

一フヒヤシムシ一マフレヤウタク一しウ

正秋氣淒涼鳴幽砌向枕畔偏惱愁心盡夜苦
乃

吟

又

一レウ乃フレシウレ一マレマフシ乃一

戴花帶酒酒泛金尊花枝滿帽笑歌醉拍手戴
レウ乃

花帶酒

元時北虜達達所用樂器如箏箏琵琶胡琴渾不似
之類其所彈之曲亦與漢人不同見輟耕錄不知其

音調詞義如何然亦各具一方之製誰謂胡無人哉
今并識於此以廣異聞

大曲

哈八兒圖

口溫

也葛倘兀

畏兀兒

閔古里

起土苦里

跋四土魯海

舍舍弼

搖落四

蒙古搖落四

門彈搖落四

阿耶兒虎

桑哥兒苦不丁

江南謂之孔雀雙手彈

答刺

謂之白翎雀雙手彈

阿厮闌扯弼

回蓋曲雙手彈

苦只把共

呂弦

小曲

哈兒火失哈赤

黑雀兒叫

阿林捺

花紅

曲律買

者歸

洞洞伯

牝疇兀兒

把擔葛失

削浪沙

馬吞

相公

仙鶴

阿丁水花

回回曲

伉俪

馬黑其當當

清泉當當

詞之異於詩也、曲之異於詞也、道迥不侔也、詩人而
以詩爲曲也、文人而以詞爲曲也、誤矣、必不可言曲
也、

嘗戲以傳奇配部色則西廂如正旦色聲俱絕不可思議琵琶如正生或裁冠博帶或敝巾敗衫具噴噴動人拜月如小丑時得一二調笑語令人絕倒還魂二夢如新出小旦妖冶風流令人魂銷腸斷第未免有誤字錯步荆釵破釜等如淨不繫物色然不可廢吳江諸傳如老教師登場板眼場步畧無破綻然不能使人喝采浣紗紅拂等如老旦貼生看人原不苛責其餘卑下諸戲如雜腳備員第可供把盞執旗而已

作閨情曲而多及景語吾知其窘矣此在高手持一

情字模索洗發方挹之不盡寫之不窮淋漓渺漫自有餘力何暇及眼前與我相二之花鳥煙雲俾掩我真性混我寸管哉世之曲咏情者強半持此律之品力可立見矣

北劇之於南戲故自不同北詞連篇南詞獨限北詞如沙場走馬馳騁自由南詞如揖遜賓筵折旋有度連篇而蕪蔓獨限而跼蹐均非高手韓淮陰之多多益善岳武穆之五百騎破兀朮十萬衆存乎其人而已

晉人言絲不如竹竹不如肉以爲漸近自然吾謂詩

不如詞、詞不如曲、故是漸近人情。夫詩之限於律與絕也、卽不盡於意、欲爲一字之益、不可得也。詞之限於調也、卽不盡於胸、欲爲一語之益、不可得也。若曲則調可累用、字可襯增、詩與詞不得以諧語方言入、而曲則惟吾意之欲至、口之欲宣、縱橫出入、無之而無不可也。故吾謂快人情者、要毋過於曲也。

曲以婉麗俏俊爲上、詞隱譜曲、於平仄合調處、曰某句上去妙甚、某句去上妙甚、是取其聲而不論其義可耳。至庸拙俚俗之曲、如臥冰記、古皂羅袍、理合敬我哥哥一曲、而曰質古之極、可愛可愛、王煥傳奇黃

薔薇三十哥。央你不來一引。而曰大有元人遺意。可愛。此皆打油之最者。而極口贊美。其認路頭一差。所以已作諸曲。畧墮此一劫。爲後來之誤甚矣。不得不爲拈出。

古人往矣。吾取古事麗今聲。華袞其賢者。粉墨其慝者。奏之場上。令觀者藉爲勸懲興起。甚或扼腕裂眦。涕泗交下。而不能已。此方爲有關世教文字。若徒取漫言。旣已造化在手。而又未必其新奇可喜。亦何貴漫言爲耶。此非腐談。要是確論。故不關風化。縱好徒然。此琵琶持大頭腦處。拜月祇是宣淫。端士所不與。

也

各調有宜遵古以正今之訛者、有不妨從俗以就今之便者、九宮新譜所載、步步嬌之第一句、玉交枝之第五句、好姐姐之第五句、江兒水之第四句、啄木兒之第六句、懶畫眉之第一句、醉扶歸之第三句、其所署平仄、正今失調、斷所宜遵、至皂羅袍第三句之平仄、平平解三醒之第四六字句、與第五七字句、下三字之平仄、平、一江風之第五六重用四字句、瑣牕寒之第八七字句、山坡羊之第七七字句、步步嬌之第五句、第二字用仄聲、從古可也、卽從俗亦不害其爲

失調也。若玉芙蓉之第六句用平平仄平，白練序之首句作四字，畫眉序之首句作三字，石榴花之首四句盡作七字，梁州序犯之第九句作七字，劉潑帽之第四句作四字，駐雲飛之第六句作三字，綿搭絮首句七字，與第三句之六字，鎖南枝之第三句六字，與換頭第一二句之五字，第三句下之多六字一句，則世俗之以新調相沿舊矣。一旦盡返之古，必羣駭不從。又水底魚兒之八句，卽剖爲二人唱，似亦無妨。風入松之每調繼以兩急三鎗，與末調之單用本調，雖古有此格，然琵琶後八折耳，安在其必當而拘拘以

此爲法也，拈出與秉筆者商之。

詞隱論北詞，謂朝天子一調，自龍泉記出而此曲失真，浣紗往江干水鄉盛行而此曲盡晦，却取太和正音韻所收張小山癭杯玉醅一首爲譜，其詞飽似伯夷一句係失調，不如中原音韻所收早霞晚霞一首爲確。蓋浣紗實倣龍泉，較原調多着襯字，其聲尚可考見也。今竝列於此。元人題廬山朝天子云：早霞晚霞，粧點廬山畫，仙翁何處鍊丹砂。一縷白雲下客去，齋餘人來茶罷，歎浮生指落花。楚家漢家，做了漁樵話。浣紗朝天子云：

往江干水鄉

過花溪

柳塘

看齊齊

綵鷁波心放，檠檠疊鼓起，鴛鴦一雙戲清波浮輕浪。

青山兒幾行，綠波兒千狀，渺茫渺茫渺茫趁東風。

蘭橈畫槳蘭橈畫槳採連歌齊聲唱，南人爲北詞而

失其本調者，卽此曲可類見矣。余頃與孫比部談及此調，比部指摘浣紗陰陽之外，余因字字分別陰陽，并盡用律中諸禁，作春遊詞一闕，鬱藍生序刻以傳好事者。今存別本，然爲法苛刻，益難中之難。要以游三尺之中，而不見一毫勉強乃佳。若一爲界限所拘，讀去礙口，便非高手也。

曲與詩原是兩腸，故近時才士輩出，而一搦管作曲，

便非當家。汪司馬曲，是下膠漆詞耳。弇州曲不多見。特四部稿中有一塞鴻秋，兩畫眉序，用韻既雜，亦詞家語，非當行曲。畫眉序和頭第一字，法用去聲，却云濃霜畫角遼陽道，知他夢裏何如。濃字平聲，不可唱也。

近之爲詞者，非調則關中康狀元對山，王太史漢陂，蜀則楊狀元升菴，金陵則陳太史石亭，胡太史秋宇，徐山人髯仙，山東則李尚寶伯華，馮別駕海浮，山西則常廷評樓居，維揚則王山人西樓，濟南則王邑佐舜耕，吳中則楊儀部南峯，康富而蕪，王艷而整，楊俊

而葩陳胡爽而放徐暢而未汰李豪而率馮才氣勃
勃時見紕繆常多俠而寡馴西樓工短調翩翩都雅
舜耕多近人情兼善諧謔楊較粗莽諸君子間作南
調則皆非當家也南則金陵陳大聲金在衡武林沈
青門吳唐伯虎祝希哲梁伯龍而陳梁最著唐金沈
小令竝斐亹有致祝小令亦佳長則草草陳梁多大
套頗著才情然多俗意陳語伯仲間耳餘未悉見不
敢定其甲乙也

王漢陂詞固多佳者何元朗摘其小詞中鶯巢溼春
隱花梢以爲金元人無此一句然此詞全文泠泠象

板粉兒敲小小金杯綠蟻飄重重畫閣紅塵落喜豐
年恰遇着幾般兒景致蹊蹺鳳團小茶烹銀罐驢背
穩詩吟野橋除鶯巢句下皆陳語後三句對復不整
又云杜甫遊春劇金元人猶當北面此劇蓋借李林
甫以罵時相者其詞氣雄宕固陵厲一時然亦多雜
凡語何得便與元人抗衡王元美復謂其聲價不在
關馬之下皆過情之論也

對山亦忤於時放情自廢與漢陂皆以聲樂相尚彼
此酬和不輟康所作尤多非不莽具才氣然喜生造
喜堆積喜多用老生語不得與王竝驅所著汴東樂

府可數百首、中元夜落梅風、春雲澹、月色昏、坐空齋、
雪餘風潤、若嫦娥肯饒春幾分、向朱簾且收寒暈、效
自君之出矣、沈醉東風、掃萬里龍沙未返、怨深閨蛾
尾空彎、泣相思柳未勻、待好會梅初綻、隔魂臺水水
山山、也要尋君到玉關、路比天涯近遠、僅此二詞、頗
饒風韻、餘未足取、第易蛾眉爲蛾尾、亦不妥耳、

升菴北調、未盡閑律、然最有佳者、余最愛其沈醉東
風小令、云、也不是石家的綠珠風韻、也不是喬家的
碧玉青春、合雙鬟夢裏來、行萬里雲南近、似蘇家過
嶺朝雲、休索我花鈿與繡裙、窮秀才床頭金盡、風流

旖旎卽實甫能加之哉

松陵詞隱沈寧菴先生諱璟其於曲學法律甚精沉
瀾極博斤斤返古力障狂瀾中興之功良不可沒先
生能詩工行草書弱冠魁南宮風標白皙如畫仕由
吏部郎轉丞光祿值有忌者遂屏迹郊居放情詞曲
精心考索者垂三十年雅善歌與同里顧學憲道行
先生竝畜聲伎爲香山洛社之游所著詞曲甚富有
紅蕖分錢埋劍十孝雙魚合衫義俠分柑鴛衾桃符
珠串奇節鑿井四異結髮墜釵博笑等十七記散曲
曰情癡寢語曰詞隱新詞二卷取元人詞易爲南調

曰曲海青水二卷、紅蕖蔚多藻語、雙魚而後專尚本色、蓋詞林之哲匠、後學之師模也、又嘗增定南曲全譜二十一卷、別輯南詞韻選十九卷、又有論詞六則、唱曲當知正吳編、及考定琵琶記等書、半已盛行於世、未刻者、存吾友鬱藍生處、生平故有詞癖、每客至談及聲律、輒娓娓剖析、終日不置、嘗一命余序南九宮譜、既就梓、誤以均爲韻、余請改正、先生復札巽辭爲謝、比札至而先生已捐館舍矣、先是數年、道行先生亦卒、自兩先生沒而吳中遂無復有繼其迹者、悲夫、

詞隱傳奇、要當以紅蕖稱首、其餘諸作、出之頗易、未免庸率、然嘗與余言、歎以紅蕖爲非本色、殊不其然、生平於聲韻宮調、言之甚悉、顧於已作、更韻更調、每折而是、良多自恕、殆不可曉耳、

顧道行先生、亦美風儀、登第甚少、曾一就教吾越、以閩中督學使者、棄官歸田、工書畫、侈姬侍、兼有顧曲之嗜、所畜家樂、皆自教之、所著有青衫葛衣義乳三記、畧尚標韻、第傷文弱、余嘗一訪先生園亭、先生論詞、亦傾倒不輟、晚年無疾、爲人作一書與郡公、投筆而逝、亦一奇也、

臨川湯奉常之曲當置法字無論盡是案頭異書所作五傳紫簫紫釵第脩藻艷語多瑣屑不成篇章還魂妙處種種奇麗動人然無奈腐木敗草時時纏繞筆端至南柯邯鄲二記則漸削蕪蘊倪就矩度布格既新遣辭復俊其掇拾本色叅錯麗語境往神來巧湊妙合又視元人別一谿徑技出天縱匪由人造使其約束和鸞稍閑聲律汰其贅字累語規之全瑜可令前無作者後鮮來喆二百年來一人而已

臨川之於吳江故自永炭吳江守法斤斤三尺不欲令一字乖律而毫鋒殊拙臨川尚趣直是橫行組織

之工幾與天孫爭巧而屈曲聱牙多令歌者辭舌吳
江嘗謂寧協律而不工讀之不成句而謳之始協是
爲中之之巧曾爲臨川改易還魂字句之不協者呂
吏部玉繩鬱藍生尊人以致臨川臨川不懌復書吏部曰
彼惡知曲意哉予意所至不妨拘折天下人噪子其
志趣不同如此鬱藍生謂臨川近狂而吳江近狷信
然哉

自詞隱作詞譜而海內斐然向風衣鉢相承尺尺寸
寸守其渠鑊者二人曰吾越鬱藍生曰櫟李大荒逋
客鬱藍神劒二姪等記并其科段轉折似之而大荒

乞麾至終帙不用上去疊字然其境益苦而不

甘矣

詞隱之持法也可學而知也臨川之脩辭也不可勉而能也大匠能與人規矩不能使人巧也其所能者人也所不能者天也

詞隱所著散曲情癡寢語及詞隱新詞各一卷大都法勝於詞曲海青冰二卷易北爲南用工良苦前二種呂勤之已爲刻行後一種勤之旣逝不知流落何處惜哉

詞隱墜釵記蓋因牡丹亭記而興起者中轉折儘佳特何興娘鬼魂別後更不一見至末折忽以成仙會

合似缺鍼線、予嘗因鬱藍之請、爲補又二十七盧二舅指點脩煉一折、始覺完全、今金陵已補刻、

詞隱生平爲挽回曲調計、可謂苦心、嘗賦二郎神一套、又雪夜賦鶯啼序一套、皆極論作詞之法、中黃鶯兒調、有自心傷、蕭蕭白首、誰與共雌黃、尾聲、吾言料沒知音賞、這流水高山逸響、直待後世鍾期也不妨、二詞見勤之刻中、至今讀之、猶爲悵然、蘇長公有言、少游已矣、雖萬人何贖、吾於詞隱亦云、

宛陵以詞爲曲、才情綺合、故是文人麗裁、四明新采、豐縟、下筆不休、然於此道、本無解處、崑山時得一二

致語陳陳相因、不免紅腐、長洲體裁輕俊、快於登場、言言機線、不成科段、其餘人珠家璧、各擅所長、不能枚舉、第尚達者或跳浪而寡馴、守法者或跼蹐而不化、若夫不廢繩檢、兼妙神情、甘苦匠心、丹腹應度、劑衆長於一冶、成五色之斐然者、則李于鱗有言、亦惟天寔生才、不盡後之君子、

吾越故有詞派、古則越人鄂君、越夫人烏鵲、越婦采葛、西施采蓮、夏統慕歌、小海河女、尚已、迨宋而有青梅之歌、志稱其聲調宛轉、有巴峽竹枝之麗、陸放翁小詞閒豔、與秦黃竝馳、元之季有楊鐵崖者、風流爲

後進之冠。今伯業艱危一曲猶膾炙人口。近則謝泰興海門之四喜。陳山人鳴野之息柯餘韻。皆入逸品。至吾師徐天池先生所爲四聲猿。而高華爽俊。穠麗奇偉。無所不有。稱詞人極則。追躋元人。今則自縉紳青襟。以迨山人墨客。染翰爲新聲者。不可勝紀。以余所善史叔考。撰合紗櫻桃。鸚鵡雙鴛。鸞鳳瓊花。青蟬雙梅。夢蓀檀扇。梵書。又散曲曰齒雪餘香。凡十二種。王澹翁撰雙合金枕。紫袍。蘭佩。櫻桃園。散曲曰款乃。編凡六種。二君皆自能度品。登場體調流麗。優人便之。一出而搬演幾遍國中。姚江有葉美度進士者。工

雋摹古、撰玉麟、雙卿、鸞鏡、四艷、金鎖、以及諸雜劇、共
十餘種、同舍有呂公子勤之、曰鬱藍生者、從髫年便
解摘掇、如神女、金合、戒珠、神鏡、三星、雙棲、雙閣、四相、
四元、二嫵、神劍、以迨小劇、共二三十種、惜玉樹早摧、
齋志未竟、自餘獨本單行、如錢海屋輩、不下一二十
人、一時風尚、槩可見已、

徐天池先生四聲猿、故是天地間一種奇絕文字、木
蘭之北、與黃崇嘏之南、尤奇中之奇、先生居與余僅
隔一垣、作時每了一劇、輒呼過齋頭、朗歌一過、津津
意得、余拈所警絕以復、則舉大白以酬、賞爲知音、中

月明度柳翠一劇係先生早年之筆木蘭禰衡得之
新創而女狀元則命余更覓一事以足四聲之數余
舉楊用脩所稱黃崇嘏春桃記爲對先生遂以春桃
名嘏今好事者以女狀元并余舊所譚陳子高傳稱
爲男皇后竝刻以傳亦一的對特余不敢與先生匹
耳先生好談詞曲每右本色於西廂琵琶皆有口授
心解獨不喜玉玦目爲板漢先生逝矣邈成千古以
方古人蓋真曲子中縛不住者則蘇長公其流哉
陳鳴野先生以詩畫書翰推重一時生平好游狹斜
故多贈青樓之作儼俏清便亦一詞場駿足余生晚

不及識先生、今相國朱文懿公、先生壻也、嘗謂余言、先生風流跌宕、喜游揚後進、兼妙聲歌、故諸作絕無累字、今不可復見矣、

董少宰中峰先生、亦吾邑人也、幼舉神童、年十九、魁南宮第一、在翰苑時、曾有應制駕幸西湖、南北調詞一闕、今存集中、卽限於體裁、亦勝楊南峰數等、

余大父爐峰公、博學高才、著述甚富、有集數十卷、往與王方湖、王真翁兩先生齊名、鄉人士稱爲於越三王、少時曾草紅葉一記、都雅婉逸、翩翩有風人之致、遺命秘不令傳、今藏家塾、余弱歲臥病、先君子命稍

更其語別爲一傳易名題紅爲屠緯真儀部強序入梓然其時所窺淺近遣聲署韻間有出入今輒大悔懼人齒及顧傳播已多不可禁止昨入都一中貴爲余言頃業曾進御可發一大笑也

南九宮蔣氏舊譜每調各輯一曲功不可誣然似集時義只是遇一題便檢一文備數不問其佳否何如故率多鄙俚及失調之曲詞隱又多仍其舊便注了平仄作譜其間是者固多而亦有不能盡合處故作詞者遇有杌隉須別尋數調仔細叅酌務求字字合律方可下手不宜盡泥舊文余非敢以翹先生之過

蓋先生雅意原欲世人共守畫一以成雅道余稍叅一隙亦爲先生作忠臣意也作譜余寔慙慙先生爲之其時恨不曾請於先生將各宮調曲分細中緊三等類置卷中似更有次第今無及矣

金元雜劇甚多輟耕錄載七百餘種錄鬼簿及太和正音譜載六百餘種康太史謂於館閣中見幾千百種何元朗謂家藏三百種今吾姚孫司馬家藏亦三百種余家舊藏及見沈光祿毛孝廉所可二三百種輟耕錄所列有其目而無其書正音譜所列今存者尚半其餘皆散逸湮沒不可復見然尚得因諸書所

載畧知梗槩、今南戲繁多、不可勝計、舊有集諸戲名、目爲曲者、今之新編、多舊已做過、以其本不傳、遂人不及見、更稍稽歲月、益滅沒、不可考矣、余欲於暇中、倣輟耕正音二書例、盡籍記今之戲曲、且甄別美惡、次爲甲乙、以傳示將來、恨未能悉見所有、又散套曲、古所傳不能盡識其人、尚有因舊刻而得其二三、者坊間射利、每僞標其名、又并時曲、亦盡題作古人名、氏、以欺世人、不可勝紀、得并古曲、亦一一畧所知者、以存一代典刑、似亦佳事、頃南戲鬱藍生已作曲品、行之金陵、散曲尚未及耳、

近吳興臧博士晉叔校刻元劇上下部共百種自有
雜劇以來選刻之富無踰此讀其二序自言蒐選之
勤多從秘本中遴出至其雌黃評駁兼及南詞於曲
家儼任賞音獨其躋拜月於琵琶故是何元朗一偏
之說又謂臨川南曲絕無才情夫臨川所謂者法耳
若才情正是其勝場此言亦非公論其百種之中諸
上乘從來膾炙人口者已十備七八第期於滿百頗
叅中駟不免魚目夜光之混又句字多所竄易稍失
本來卽音調亦間有未叶不無遺憾晉叔故儔本詩
文竝楚楚乃津津曲學而未見其一染指豈亦不敢

輕涉其藩耶。要之此舉，蒐奇萃渙，典刑斯備，厥勩居多。卽時露疵繆，未稱合作，功過自不相掩。若其妍媸差等，吾友吳郡毛允遂，每種列爲關目，曲白三則，自一至十，各以分數等之。功令犁然，錙銖畢析，其間全具足數者，十不得一。旣嚴且確，不愧其家董狐，行當縣之國門，毋庸贅一辭矣。

客問今日詞人之冠，余曰：於北詞得一人，曰高郵王西樓，俊艷工鍊，字字精琢，惜不見長篇。於南詞得二人，曰吾師山陰徐天池先生，瑰瑋濃鬱，超邁絕塵，木蘭崇嘏二劇，剝腸嘔心，可泣神鬼，惜不多作。曰臨川

湯若士、婉麗妖冶、語動刺骨、獨字句平仄多逸三尺、然其妙處、往往非詞人工力所及、惜不見散套耳、問體孰近、曰於文辭一家得一人、曰宣城梅禹金、摘率揆藻、斐亶有致、於本色一家、亦惟是奉常一人、其才情在淺深濃淡雅俗之間、爲獨得三昧、餘則脩綺而非塚、則陳、尚質而非腐、則俚矣、若未見者、則未敢限其工拙也、

孫比部、諱如法、字世行、別號侯居、吾郡之餘姚人、忠烈公會孫、而清簡公冢子也、蚤穎、甫髫舉於順天、以進士高第、授官比部、上疏請建皇太子、及論鄭

貴妃不宜先 王恭妃冊封 神廟震怒擬賜杖賴

政府疏救謫尉潮陽遂杜門不出時居柳城

先生別墅

以

圖史自娛雅精字學喜校讐自經史諸子而外尤加
意聲律詞曲一道詞隱專釐平仄而陰陽之辨則先
生諸父大司馬月峰公始挾其竅已授先生益加精
覈嘗悉取新舊傳奇爲更正其韻之訛者平仄之舛
者與陰陽之乖錯者可數十種藏於家塾時爲鬱藍
生言吾於諸傳奇咸不難矢筆更定獨於玉合題紅
二記欲稍更一二字不能施手以其詞佳勉更之便
失故吾耳又與湯奉常爲同年友湯令遂昌日會先

生謬賞予題紅不置因問先生此君謂予紫簫何若

時紫釵以下俱未出

先生言嘗聞伯良艷稱公才而畧短公法

湯曰良然吾茲以報滿抵會城當邀此君共削正之
既以罷歸不果故後還魂記中警夢折白有韓夫人
得遇于郎曾有題紅記語以此先生自謫歸人士罕
見其面獨時招予及鬱藍生把酒商確詞學娓娓不
倦嘗慙憑予作曲律及南韻曰此絕學非君其誰任
之頃予考注西廂相與訂定疑竇往復手札蓋盈笥
篋竟以目眚誤醫病卒底今時時有西州之愴予於
陰陽二字之旨寔大司馬暨先生指授爲多不敢忘

所自得於其沒也。識以寄痛。

鬱藍生、呂姓、諱天成、字勤之、別號棘津、亦餘姚人。太傅文安公會孫、吏部姜山公子。而吏部太夫人孫、則大司馬公姊氏。於比部稱表伯父。其於詞學、故有淵源。勤之童年、便有聲律之嗜。既爲諸生、有名。兼工古文詞。與予稱文字交。垂二十年。每抵掌談詞。日仄不休。孫太夫人好儲書。於古今劇戲、靡不購存。故勤之汎濶極博。所著傳奇、始工綺麗。才藻燁然。後最服膺詞隱。改轍從之。稍流質易。然宮調字句平仄、兢兢。晷晷不少假借。詞隱生平著述、悉授勤之。竝爲刻播。可

謂尊信之極、不負相知耳。勤之制作甚富、至摹寫麗情、褻語尤稱絕技。世所傳繡榻野史、閒情別傳、皆其少年游戲之筆。予所恃爲詞學麗澤者四人、謂詞隱先生、孫大司馬、比部侯居、及勤之。而勤之尤密邇旦夕、方以千秋交勗、人咸謂勤之風貌玉立、才名籍甚、青雲在襟袖間、而如此人、曾不得四十、一夕溘先風流、頓盡悲夫。予頃賦四君咏、別刻方諸館集中、曲律故勤之及比部促成、嘗爲予序、喟有餘悵、遂并比部梗槩識之後簡。

勤之曲品所載、蒐羅頗博、而門戶太多、舊曲列品有

四曰神曰妙曰能曰具而神品以屬琵琶拜月夫曰神品必法與詞兩擅其極惟實甫西廂可當之耳琵琶尚多拘字額句可列妙品拜月稍見俊語原非大家可列能品不得言神荆釵牧羊孤兒金印可列具品不得言妙新曲列爲九品以上之上屬沈湯二君而以沈先湯蓋以法論然二君旣屬偏長不能合一則上之上尚當虛左至後八品亦似多可商畧復於諸人槩飾四六美辭如鄉會舉主批評舉子卷牘人珠玉畧無甄別蓋勤之雅欲獎飾此道誇炫一時故多和光之論予謂品中止宜取傳奇之佳者次及

詞曲畧工、搬演可觀者、總以上中下三等第之、不必多立名目、其餘俚腐諸本、竟黜不存、或盡摻人間所有之本、另列諸品之外、以備查攷、未爲不可、至散曲又當別置一番品題、始爲完局、故夫目具蕭統筆嚴董狐、勒成不刊之書、以傳信將來、吾則不暇、以俟後之君子、

夏文彥論畫三品、曰氣韻生動、出於天成、人莫窺其巧者、謂之神品、謝赫品畫、以陸探微居第一、謂窮理盡性、事絕言象、包前孕後、古今獨立、非復激揚所能稱贊、但價重之極、於上上品之外、無他寄言、故屈標

第一以之方曲神品與第一可易言哉

散曲絕難佳者北詞載太平樂府雍熙樂府詞林摘艷小令及長套多有妙絕可喜者而南詞獨否勤之第載其名不及列曲詞隱南詞韻選列上上次上二等所謂上上亦第取平仄不訛及遵用周韻者而已原不曾較其詞之工拙又只是無中揀有走馬看錦子細着鍼砭不得中小令間有佳者而長套無一中窾頃友人吳興關仲通同諸君過集齋頭商推其較予爲言小令如唐六如祝枝山輩皆小有致而祝多漫語康對山王漢陂常樓居馮海浮直是粗豪原非

本色陳秋碧沈青門梁少白李日華金白嶼時有合
作處然較之元人則彼以工勝而此以趣合長套亦
惟是陳秋碧梁少白最稱爛熳陳起句兜的上心來
薄倖太情雜等皆不成語梁無此等累句而陳時得
一二致語顧二君疵類自爾不少他卽稍有可觀而
腔韻不合者又不足數也仲通謂如子言良確然究
竟彼善寧無一長因舉帙中人所常唱而世皆賞以
爲好曲者如窺青眼暗想當年羅帕上曾把新詩寫
因他消瘦樓閣重重東風曉人別後諸曲爲問子謂
前三曲已載前論第十六第二十四篇中卽後二曲

母論意庸語腐不足言曲亦疵病種種不可勝舉如樓閣重重一曲前曰東風曉後又曰風雨清明到又曰東風畫橋前曰垂楊金粉消後又曰柳絲暗約玉肌消前曰綠映河橋後又曰東風畫橋前曰燕子剛來到又曰畫棟梁空落燕巢前曰心事上眉梢後又曰心牽意掛又曰我心中恨着前曰恨人歸不比春歸早後又曰那人何事還不到前曰病懨懨難禁這兩朝後又曰悶懨懨離情懊惱前曰落紅惹得朱顏惱後又曰落花和淚都做一樣飄而朱顏惱又與離情懊惱重前曰柳絲暗約玉肌消後又曰如今瘦添

楚腰前曰夢回蝴蝶巫山杳後又曰雲散楚峰高前
曰月明古驛後又曰紗牕月曉前曰繡戶生芳草後
又曰別離一旦如秋草而別離句又與離情懊惱重
又一曲而押二曉字三消字二橋字二到字二早字
二惱字又綠映河橋月明古驛非閨中語又醉扶歸
首二句皂羅袍中四字句俱宜對而不對中僅恨人
歸不比春歸早及落花和淚都做一樣飄二語稍俊
至末可惜粧臺人易老又不成語詞隱亦以爲不思
量寶髻五字當改作仄仄平平花堆錦砌當改作
去上去平怕今宵琴瑟琴字當改作仄聲故止列次

上人別後曲、蔣氏舊譜謂是高則誠作、亦未必然、首調以七夕起、而寒蟬衰柳、水綠蘋香、非七夕語、得成就句、與上文不接、真箇勝腰纏跨鶴揚州、俚甚、又腰纏下無十萬貫語、所纏何物、旣曰暮雨過紗牕涼已透、又曰雨散雲收、又曰西風桂子香韻幽、又曰滿城風雨還重九、集賢賓首調言中秋、而聽寒蛩聲滿牀頭、非中秋語、次調起句用八字、非體、旣曰虛度中秋、又曰見池塘已暮秋、又曰對景傷秋、又曰傍水芙蓉兩坼秋、又曰強把金尊斷送秋、旣曰水綠蘋香人自愁、又曰一種相思分做兩處愁、又曰遮不斷許多愁、

又曰添愁、旣曰如病酒、又曰白衣人送酒、又曰惟酒
可消憂、又曰強把金尊斷送秋、旣曰水綠蘋香、又曰
相映白蘋洲、旣曰綠荷、又曰橘綠、旣曰一種相思、又
曰相思未休、旣曰水綠蘋香、又曰霜降水痕收、又曰
傍水芙蓉兩畝秋、旣曰空房自守、又曰淒涼怎守、旣
曰滿城風雨還重九、又曰一年好景還重九、一曲押
二柳字、四愁字、五秋字、二收字、三酒字、二頭字、三九
字、惟二瘦字則同句可竝押、稍不妨、中怕朱顏去也
三句語意俱不相蒙、白衣送酒二句無謂、幾番血淚
句與上不相接、羈人無力無力不通、綠荷紅蓼白蘋

芙蓉、橘、綠、橙、黃，何堆積至此，末句斷送秋，復不成語。
弁州評此曲，謂不免雜以凡語，疵病如此，詎止凡語。
已取總之二曲，無大學問，一也；無大見識，二也；無巧
思，三也；無俊語，四也；無次第，五也；無貫串，六也；只是
餽飣一二膚淺話頭，強作豪呶，令盲小唱，持堅木拍
板，酒筵上，嚇不識字人，可耳。何能當具眼者，繩以三
尺，舉此一斑，他可知矣。仲通曰：善。子論如倉公按脉，
百病皆見，勝不敢復相士矣。然請從末減，畧取備員。
曰：無已。則舊譜所載古詞，咏赤壁、大江、逝水、念奴嬌、
五調，及楊鐵厓蘇臺弔古、霸業艱危、夜行船序六調。

二詞頗具作意惜皆用韻厖雜前詞更甚故詞隱韻
選不收此外似無可取矣仲通擊節謂子殊深文然
不如此不足論曲

一日復取鐵厓詞諦觀之殊不勝指摘此詞出入三
韻起語霸業艱危句便腐而迂下玉液金莖二語事
既纖細語亦湊插第二調自勾踐雄徒起至下身國
俱亡十許語句句老生陳唾且雄徒不雅靈胥生造
鬪黑螭次調橋李亭荒三語與下錦衣香起館娃宮
荆榛蔽四語又下漿水令起採蓮涇紅芳盡死四語
俱是一意又煙花山水楊柳水殿歌剩水殘山香水

鴛鴦去、無邊秋水、五水字重用、又下蒼煙蔽、與荆榛
蔽、二蔽字重、高臺、郊臺、臺城、層臺、四臺字重、綠樹、雲
樹、二樹字重、走狗鬪雞鬪字當用平聲、黍離、故墟、墟
字當用仄聲、漿水令首末二段、宜對不對、末句復少
一字、蓋此曲之病、用韻雜出、一也、對偶不整、二也、塵
語俗語、生語重語疊出、三也、此老故以詞曲自豪、今
其伎倆乃止如此、吾非好爲刻覈、就曲論曲、不得不
爾、至大江逝水一曲、則與此不同、其詞第灑括蘇語
及叅入赤壁二賦語、不必已創、無多瑕隙、特蘇詞元
用古韻、假借太甚、不美歌聽、又起處悠悠萬頃、與茫

茫東去接用古城石鼎水落石出穿空亂石三石掌
疊用終非作法爲足恨耳以是知曲之爲道其誦良
苦其境轉深良工不示人以樸一時草草掩護無從
可不慎諸

世所傳黃鶯兒寒食杏花天唐伯虎詞也二犯桂枝
香韶光似酒秦憲副詞也玉芙蓉殘紅水上飄李日
華詞也金索掛梧桐東風轉歲華七犯玉璫瓏新紅
上海棠祝京兆詞也瑕瑜自不相掩畫眉序一見杜
韋娘夜行船序堪賞花朝泣顏回東野翠煙消普天
樂四時歡千金笑等曲則學究之作自然紅腐滿耳

南北調小牕低臥日三竿步步嬌宦海茫茫京塵渺
又儒先大老之筆不得以曲道繩之耳

今世所傳西樓樂府有二一爲王磐字鴻漸高郵人
一爲王田字舜耕濟南人二人俱號西樓舜耕之詞
較鴻漸頗富然大不如鴻漸精鍊如浴裙睡鞋閨元
宵轉五方等曲皆鴻漸作弇州所謂頗警健工題贈
而淺於風人之致者蓋指舜耕非鴻漸也鴻漸樂府
曾見太學所存書籍亦列其目爲時所重可知已
弇州所謂趙王之紅殘驛使梅楊邃菴之寂寞過花
朝李空同之指冷鳳凰生陳石亭之梅花序顧未齋

之單題梅、王威寧之黃鶯兒、今惟寂寞過花朝一曲，尚有傳者，自餘皆不及見，不知其工拙如何，要皆坊間盲賈棄擲不存之故，殊可惜也。

李空同何大復，必不能曲，其時康對山、王漢陂皆以曲名，世爭傳播，而二公絕然不聞，以是知之，卽弇州所稱空同指冷鳳凰生句，亦詞家語，非曲家語也。

甬東薛千仞遺筆餘二卷，中載王漢陂好爲詞曲，客有規之者曰：聞之太上立德，其次立功，其次立言，公何不留意經世文章，漢陂應聲曰：予不聞其次致曲乎？足稱雅誼。

世無論作曲者難其人，卽識曲人亦未易得。藝苑卮言談詩談文，具有可采，而談曲多不中窾，何怪乎此道之汶汶也。

天之生曲才，與生一曲喉，一也。天苟不賦，卽畢世拈弄終日，咿呀拙者仍拙，求一語之似，不可幾而及也。然曲喉易得，而曲才不易得，則德成而上，與藝成而下之殊科也。

吾友季賓王與予同筆研最久，讀書好古，作文賦詩，事事頡頏爭先，獨不能爲詞曲，嘗謂我甘北面，子幸教我。予謂天寔不會賦，子此一副腎腸，姑勿妄想。賓

王惓然、

一日席間、柳元穀舉王西樓走失雞、滿庭芳、平生淡薄、叶雞兒不見、童子休焦、家家都有閒鍋竈、任意烹炮、煮湯的貼他、三枚火燒、穿炒的助他、一把胡椒、倒省得我門、東道免終朝報曉、直睡到日頭高、瓶中杏花爲鼠嚙倒、朝天子、斜插句杏花、當一幅橫披畫、毛詩中誰道鼠無牙、却怎生咬倒了金甌架、水流向牀頭、春拖在牆下、這情理寧甘罷、那里去告他、何處去訴他、也只索細數着、箇兒罵二曲、以爲妙絕、予謂良然、然吾嘗欲爲此、君更易數字、元穀曰、何謂、予曰、前

一曲穿炒而用胡椒、毋太熱乎、欲更作花椒、後一曲、
插花觥中而曰、當一幅橫披畫、毋太矮而闊乎、欲更
作單條、下毛詩中誰道齒無牙、使村人聽之、不以爲
茅司中杏花乎、是爲語病、欲更作笑詩、人浪說鼠無
牙、乃妥耳、元穀鼓掌大快曰、恨不令西樓聞之、定當
頰首稱服、舉座爲之闐堂、

作曲如美人、須自看目齒髮、以至十筓雙鉤、色色妍
麗、又自筭黛衣履、以至語笑行動、事事襯副、始可言
曲、是故以是繩曲、而世遂無曲也、

詞曲不尚雄勁險峻、只一味嫵媚閒艷、便稱合作、是

故蘇長公辛幼安並寘兩廡不得入室

曲之道廣矣大矣自王公士人以迨山林閨秀人人許作而特不許僧人插手

予昔譜男后劇曲用北調而白不純用北體爲南人設也已爲離魂并用南調鬱藍生謂自爾作祖當一變劇體旣遂有相繼以南詞作劇者後爲穆考功作救友又於燕中作雙鬟及招魂二劇悉用南體知北劇之不復行於今日也

宋詞如李易安孫夫人阮逸女皆稱佳手元人北詞二三青樓人尚能染指今南詞僅楊用脩夫人黃鶯

兒所謂積雨釀春寒、見繁花、樹樹殘、泥塗滿、眼登臨
倦、江流幾灣、雲山幾盤、天涯極目空腸斷、寄書難、無
情征雁、飛不到滇南、一詞稍傳、第用韻出入、亦恨無
閨閣婉媚之致、予疑以爲升菴代作、自餘皆不聞之、
豈真古今人不相及耶、

山東李伯華所作百闕、傍粧臺、爲康德涵所賞、予購
讀之、盡儉父語耳、一字不足采也、

世所謂才士之曲、如王弇州、汪南溟、屠赤水輩、皆非
當行、僅一湯海若、稱射鵰手、而音律復不諧、曲豈易
事哉、

今之詞曲卽古之樂府也。吾友桐栢生嘗取古樂府中所列百餘題盡易今調爲各譜一曲其辭亦雅麗可喜大是佳事勤之已爲刻行。

宋詞見草堂詩餘者往往妙絕而歌法不傳殊有遺恨。予客燕日亦嘗卽其詞爲各譜今調凡百餘曲刻見方諸館樂府。

予考索甚勤而舉筆甚懶每欲取古今一佳事作一傳奇尺寸古法兼用新韻勒成一家言倥傯不果卽冬青一事係吾家王脩竹監簿以故宋戚畹不勝痛憤捐重貲命家客唐林二君爲之而已諱其事世遂

泯泯不白然見他書可考大荒逋客嘗一爲冬青記然亦泥舊聞余擬另爲一傳署曰義陵以洗發先烈尚爾缺然他日終當一酬此夙願耳

南曲之必用南韻也猶北曲之必用北韻也亦猶丈夫之必冠幘而婦人之必笄珥也作南曲而仍紐北韻幾何不以丈夫而婦人飾哉吾之爲南韻自有南曲以來未之或省也吾之分姜光堅涓諸韻自有聲韻以來未之敢倡也吾又嘗作聲韻分合之圖蓋以洩天地元聲之秘聖人復起不能易吾言矣

吾友王澹翁好爲傳奇予嘗謂澹翁若毋更詩爲第

月染指一傳奇，便足持自愉快，無異南面王樂。澹翁曰：何謂？予謂卽若詩而青蓮少陵能令艷冠裳而麗粉黛者，日日作渭城唱乎？澹翁大笑鼓掌，以爲良然。一時戲語，然亦不失爲千古快談也。

西廂琵琶二記，一爲優人俗子妄加竄易，又一爲村學究謬施注解，遂成千古煩冤。予嘗取前元舊本，悉爲釐正，且并疏意指其後。目曰方諸館校注二記，竝行於世。吾友袁九齡嘗謂屈子抱石沈淵，幾二千年，今得漁人一網打起，聞者多爲絕倒。蓋二傳之刻，寔多九齡慫慂成之云。

實甫西廂千古絕技微辭奧旨未易窺測予之注釋筆之所錄總不逮口之所宜頃在都門日吳文仲莊冠甫諸君合三十餘人於米仲詔繕部湛園邀予擁臯比一悉其義諸君莫不解頤擊節稱快冠甫謂實甫有知當含笑地下醉後分韻各賦一詩黃中宜繕錄成帙仲詔爲作序題曰艷情詩以傳一時目爲奇事今四方好事者往往購去以當談資云

小曲掛枝兒卽打棗竿是北人長技南人每不能及昨毛允遂貽我吳中新刻一帙中如噴噀枕頭等曲皆吳人所擬卽韻稍出入然措意俊妙雖北人無以

加之故知人情原不相遠也

予爲雜論每得數語輒拈管書之積且盈帙因自笑無裨大道不如且已遂爲閣筆

律成吳郡毛允遂謂子信多聞曷不律文律詩而以律曲何居予謂吾姑從世界闕陷者一脩補之耳曰謂卑者苦不入而高者訾不急奈何予謂吾故不爲擔菜傭若咬菜根輩設也旣取予故所賦曲曰方諸館樂府者卒業輒拍几叫絕謂說法惟爾成佛作祖亦惟爾莊生有言道在荑稗在螻螳信哉其識吾言簡末戲爲筆此

論曲亭屯第四十

迂愚叟之志牡丹也。有榮辱籍焉。夫曲曷嘗不藉所遇以爲幸不幸哉。遇則亨而不過則屯也。戲次其事。各得四十則。附志於後。以當好事者一噓。

曲之亨

華堂 青樓 名園 水亭 雪閣 畫舫

花下 柳邊 佳風日 清宵 皎月 嬌喉

佳拍 美人歌 變童唱 名優 姣旦

伶人解文義 艷衣裝 名士集 座有麗人

佳公子 知音客 鑒賞家 詩人賦贈篇

座客能走筆度新聲 閨人繡幕中聽 玉
卮 美醢 佳茗 好香 明燭 珠箔障
繡履點拍 倚簫 含笙 主婦不惜纏頭
厮僕勤給事 精刻本 新翻艷詞出
曲之屯

賽社 釀錢 酹願 和爭 公府會 家宴
酒樓 村落 炎日 淒風 苦雨 老醜
伶人 弋陽調 窮行頭 演惡劇 唱猥詞
沙喉 訛字 錯拍 刪落 鬧鑼鼓 儉
父與席 下妓侑尊 新筍酒敗喉 惡客闖

座客至犬豪 酗酒人罵座 席上行酒政
將軍作調笑人 三脚猫人妄譏彈 村人
喝采 鄰家哭聲 僧道觀場 村婦列坐
小兒啼 場下人厮打 主人惜燭 家僮告
酒竭 田父舟人作勞 沿街覓錢

余不諳詞法而酷好詞致猶憶弱冠之年侍
先君子山陰署中獲同王伯良先生研席先
生於譚執之暇每及詞曲津津乎有味其言
之余間舉古傳奇若雜劇中瑕瑜處相質先
生輒頥解首肯謂可以言曲先生於此道故
本夙悟加以精探遂攬自宮調以至韻之平
仄聲之陰陽窮其元始究厥指歸靡不析入
三昧吾邑詞隱先生為詞壇盟主持法之嚴

鮮所當意獨服膺先生謂有冥契諸所著撰
往來商榷先生常欲進余堂廡指授衣鉢余
謝未皇歲癸亥先生病入秋忽馳數行緘一
帙來曰吾生平論曲為子所賞顧喙也非筆
也寢久法不傳功令斯湮正始永絕吾用大
懼今病且不起平日所積成是書曲家三尺
具是矣子其為我行之吳中余啓讀之則曲
律也方在校刻而訃音隨至茲函蓋絕筆耳

先生淹通藻發其所為詩若古文辭卓然成
一家言有方諸館集久行於世遺草多未入
梓獨忍死以是編相付先生嘗謂吾姑從世
界缺陷處一修補之此意殊可念先生舊嘗
校注古本西廂琵琶二傳一洗沈譌特擅精
博並徵余言弁首猶是屬意衣鉢狂狷之極
思余卒逡巡未能一領其秘亦不意其遂為
古人竟以此負先生矣先生作有題紅記及

男后離魂救友雙環招魂諸劇膾炙一時乃
最所意得則有方諸館樂府二卷悉散套與
小令家繕部兄方為剔之金陵蓋先生一生
鍾有情癖故但涉情瀾留連宛轉盡態極妍
令人色飛腸斷尤稱擅場洵是千古絕技今
二書並行庶不為千古絕學藉以不終負先
生嘉惠之意其在斯乎余原不諳曲法故律
中微密不置論亦不復須論聊綴數語簡後

用紀顛末以志輟絃之痛

天啟開逢困敦之歲季春上浣五日松陵友
弟毛以燧跋

附

別毛允遂

王驥德

三十年来向與禽可憐同調復同心如蘭自
合推交誼流水常能借賞音病久故應傷四
壁路長難慰報雙金他時夢裏遙相訪烟水

茫茫可易尋

先生以此詩同曲律來告訣使甫復命遂卒

哭王伯良先生詩十三首

毛以燧

屈指論交三十季寸心金石未為堅而今流水知音去腸斷牙生在輟絃

官衙觚槩乍相依夜々燒鐙屑競霏非但能言不可得祇應天壤解人稀

追憶分闈攬袂時山亭落日酒重醺忘年小友君能許何處逢人不寄詩

梁園同作者花人並馬蒐奇角句新轉憶令

原增涕淚遺綿悽斷忍重陳

昔歲余過先庫部兄陳畱署中

先生適至同為汴遊
刻有遊梁攬古諸作

君才什倍失對侯我亦青衫滯白頭一度相
逢一悲咤更堪操管哭長楸

山陰道上昔年遊遙咏巴山便解愁此相西
窓人不見斷雲咽水下孤舟

盈々如帶一江分每到相思悵暮雲猶記別

時鶯水畔槐風梅雨泣離羣

由來玄晏重三都雙壁居然借小巫從此無

心存敝帚他時誰與任前驅

余小刻二種並徵先生序篇

方諸集在見琳瑯餘草塵緘積滿牀手取一

編臨歿寄敢辭含痛與商量

每過東林輒繫舸便題尺一遺相邀遠公情

累消除盡猶共銜悲賦大招

先生與平望殊勝寺道源上人

稱方外莫過必留止招余兄弟出留連信宿乃去頃余走哭先生上人實僭